

Rosa de la Rojala

pê *Kotyè j'èpèluvé*

Novala djémé olya

In rinvojin lè gajètè èpardzemalâlyè chu la trâbia, Rosa de la Rojala lè folyatâvè on bokon. Li falyi pâ to fotre ou rèbu. La paperache dè chon chènaya irè fête dè dutrè gajètè, piènè dè pâdzè dè j'anonthè, dè politike, dè palâbro chu le martyi dè l'ouâ, lè j'obedyi dè bankè ke grapilyon è ke ravelon.

I balyivè on kou d'yè a la pâdze di j'akchidin, di dièrè, di machakro, dè to chin ke bathèlyè lè dzin, ke chènè la rina è la fan on bokon pèrto. I léchivè dutrè papè chu on kâro dè trâbia, hou ke chon chènaya povi onkora vouityi in atindin la novala pachâlye dou fakteu.

Chè kontintâvè dè fotre on kou d'yè chu lè pâdzè pye roujè, hou ke dèvejon dè mujika, dè tsan, dè prône chu le mariâdzo è chè rèbritsè. I ch'intselyivè chuto dè lèvro ke li rindan chèrvucho po chè j'ètudè, hou ke dèvejon dè rêmêdo, dè novalè moudè po chonyi lè malâdo. Lè drougè moubyâvan cha chahyinthè. Irè diora ou bè dè chè j'ètudè d'apotityéra. To chin ke povi aprindre por inretsi che n'èchyin l'aterivè. Po chin, i prenyè le tin d'akutâ la radyô è dè vouityi la télé. L'avi na tota galéja vouè; i faji partya dou kâ de l'univerchitâ. Che li avi on solô dè soprano, irè galyâ chovin por li.

I tsantolâvè in intètsin lè papè po lè rêvoudre, po betâ on bokon d'ouâdre pê le pêlyo. Chon chènaya atindè cha kobia dè j'èmi ke vinyan dzulyi i k'artè. Hou j'omo palâbrâvan on bokon in atindin le dêri dzulyà. To li pachâvè. Lè grâta papè, hou ke mènnon lè j'afère de la vela iran to tyè brâvè dzin, l'avan chure l'orolye drête ke chubyâvan chovin. Lè prèkô, lè député pachâvan achebin in dyuchtiche dè kabarè, n'in chalyivan pye botsâ tyè bian. Di kou, lè prône fujâvan chu lè dzin dou mondo, hou ke chè fan a bigornâ, chu lè fèmalè tyintâjè, lè piti travè de la lya è lè gônyè di dzin de la kotse.

Le piéji de la dzounèta et chon fô-ri i hyorechan tyè kan le Djanè, ache rujâ po dzulyi i kârtiyè tyè po kontâ di fâchè, keminhyivè a n'in dèbiotâ di chuvè. L'avi la blaga trankramin bin afelâlye. Cha mina rijolinta ke chè touâjè, ke potèlyivè è grimachivè d'achuvin chè rijârdè, fajan inbourdilyi è rèkathalâ ti hou ke l'akutâvan. Chin i dourâvè na vouèrbèta, tantyè ke kôkon rèhyamichè le tapi. I falyi lè kârtè po ruvâ lè dzulyà chu lou dyu. I dejan pâ pi mèrthi kan Rosa lou rênoualâvè la botolye dè rodzo, dèvan dè chè tsigâ ou pêlye dêrè.

La grahyàja irè filye cholèta.

Vouèthâlye? lè pâ le mo. I mankâvè dè rin, l'invide dè parèthre la chèkutâvè pâ.

Fô dre k'irè galyâ galéja. Di j'yè bron pyin dè douhyâ, la falyoutse nirâlye ke li tsejè in tire bouchon chu lè j'èpôlè, di dzoutè a fothètè, la botse rijolinta. To chin li balyivè on è on tan chi pou èthrandzo è damâ. L'avi pâ fôta dè ch'inbardoufâ le potré po pière.

Kan lè j'ômo la tsèrkotâvan, terivan in n'an di réjon dè dzounelè po la turlupinâ, kan la gabâvan in li dejin ke l'avi tyè a rijolâ po betâ lè pye galé dzouno a dzenâ, ke l'avi tyè a rèlyi po fére le pye bi l'akordèron dè Dzenèva, Rosa l'avi la rèplika prou viva po dèveri l'orâdzo, to t'in balyin a chavè ke le momin dè kortijâ povi atindre, ke por ora, lè j'ètudè li

prenyan le mèlyou dè chon tin è dè chè pochyin. Kan le chènya tsanpâvè on tan chi pou ou tsè, lè la dona ke terivè le pyin in dejin pâ voli chè mèhyâ di j'afère è di go dè cha filye.

In betin la paperache de la dzornâ din le krebilyon dou rèbu, Rosa la balyi on kou d'yè chu la folye d'avi dè Bulo, na gajèta ke chon chènya vouêrdâvè in chovinyi d'on èmi dou kontinjan k'irè grâta papê in Grevire.

La pâdze di mouâ la léchia tota bèda. La kru rèkonyèthre cha foto din l'anonthé de la mècha dou bu dè l'an po na fèmala a non Rosa, kemin li.

Mimo fô ri, mimè fothètè chu lè dzoutè, mimo gran pê on tan chi pou freji. Kemin èthe pochubio ke pouécho rèchinbyâ a na fèmala ke konyecho pâ, ke chàbrè a mè dè then kilomètre dè vèr no?

Ha foto li a fi a rèveri le chan... i chinbyâvè ke hou j'yè chè ruvâvan chu lè chio.

Irè tota rèbulya, chè moujiron fajan le toua dè chon mondo.

L'avi pâ fôta dè merià po fére la konparéjon, ma li ari falyu kôkon po la trantyliljâ.

Lè veré ke rèchinbio pâ a chènya chè deji la grahyâja. Lè gran è mégrelè, drè kemin on dzon. L'a le nâ bothu, ke bârè on potré i dzoutè mô rabotâlyè. Dona lè pye ragota, l'a le nâ on tan chi pou ramuhyâ, rin kemin le chio. L'a la falyoutse biada, chin frejon. L'on è l'ôtro l'an lè j'yè pê ke tiron chu le bleu dèlavâ.

Rosa l'a pâ pu rinvoudre ha pâdze avui le richto de la gajèta. Ha foto li korché apri, la trakachivè, inkemahyâvè chè j'idé, broulyivè chè chovinyi.

L'a volu kore a l'othô vè cha dona, ma i chè ratinyète. Cheri mè mô fyâ dè mè parin che lou mothrè chin, chè moujâ la dzounèta. Ch'ôtyè l'a kriji intrè là, mè vèré mô dè mè mèfiâ, dè lou dèmandâ ôtyè, dè léchi krère ke chènya lè pou t'ithre tyè on parithro, ke dona... anfin, i oujâvè pâ moujâ a ôtyè dinche.

Na réjon olyucha li a grantenè, kan irè filyèta, li è rèvinyète in titha. Irè na koujena dè cha dona ke l'avi kudyi dre ôtyè chu chè tré k'iran galyâ chin parintâ avui hou de la familye, chu la tsanthe ke l'avan j'à avui li. La dichkuchion l'avi rounyi kour è djèmè tantyè a vouè, Rosa l'avi dotâ d'ôtyè.

Le premi dechando dè kondyi, Rosa, ke povi pâ chalyi chi potré dè cha titha, chè inbrilyâlye de la pâ de la Grevire. L'avi de falyi modâ po chè j'ètudè. L'a pâ jou dou mô dè trovâ le velâdzo de la Bâcha Grevire, lyô la mècha dou bu dè l'an irè jou anonhya.

Pri dou mohyi, chè prèchke chintya ateria pê na foucha tota hyoria. In touajin na dzelofrèlye, la dèkrouvâ la foto, galyâ parère tyè ha de la gajèta.

On derè ke la vouè dou chan li a rounyi le chohyo. Rosa lè vinyète pye tramouâlye tyè la vèlye dè chè rèkonyèthre dinche, dè rèchinbyâ kemin na bèchena a chi potré dè filye mouârta è intèrâlye. L'a chintu chon kâ ch'èthrindre kemin chi de n'infan dèvan le vâ dè cha dona.

Na vilye fèmala k'irè to pri l'a dèvejadyi ha filye. L'a pâ oujâ li fére na rèmârka por avi touâ le po dè botyè. Chè ètsekâlye, prèch'inchôvâlye chin vouityi in arê.

Chu le monuman byan la dounèta l'a pu lyère " a nouthra filye Rosa 1960- 2000."

I chinbyâvè ke ha foto li faji chunyo, ke voli dèvejâ. Hou j'yè hyirivan din lè chio, kemin ch'ôchan volu li dre ôtyè.

Chu le tsemin, la fèmala vihya nêre alâvè in prèchin le pâ. L'a prè le chindè ke menâvè a na méjon dè payjan.

Rosa l'a rèprè chè j'èchpri. Li a falyu na bouna dôdze d'andon por alâ teri la chenalyèta dou pouèrso de la méjon.

Na bête chè fête a la pouârta. La patrena l'a pâ pi chorèlyu la filye ke la pouârta chè rèkotâlye.

Rosa, tot'intrèprècha, chavi pâ bin tyè fère. Kan l'a jou veri lè rin po ch'indalâ, na vouè li a fè

- Tyè voli vo?

- I chu dè pachâdzo, l'avé ôtyè a vo dèmandâ!

- Dyu châ tyè... i ché rin mè, vo konyecho pâ!

La pouârta chè rèkotâlye.

- Chôpyé madama! Kemin nion la fi ka dè cha vouè, Rosa l'a trovâ le korâdzo dè rèteri chu la chenalyèta

- Adi rè vo, ma toparè, tyè voli-vo?

- Rosa, din ha foucha, lè vouthra filye?

- Ma filye?... binchure.. ma chôpyè, nekoué ithè vo? Vo li konya?

- Na madama, lé pâ konya, ma... vo konprindè pâ portyè i vudré chavè?

- Mon Dyu! i mè chinbyè ke vinyo mô... portyè vo mè vouityidè kochin?

- Ché pâ !...portan ôtyè mè dèmedzè.. vudré chavè portyè li rèchinbio.

- Vo krèdè? de la rèchinbyanthe?...lè pâ pochubio chin... apri to, pou t'ithre bin!

- Tyè pou t'ithre?

- Lè veré, vo li rèchinbyâdè galéjamin... ora portyè?

- Irè mariâlye?

- Mariâlye? na!

- L'a jou di j'infan?

- Di j'infan? na! anfin i ché pâ bin!

- Na filyèta? Li a grantin dè chin?

- Mon Dyu? tyè ke vo tsèrtyidè pèr inke?

- Li a galyâ vint'an, dzoa po dzoa, ôtyè dinche?

- Vo mè fédè pouère!...dzoa po dzoa: kemin pouédè-vo dre chin?

- Vouè, lè mon kantymo, lé vint'an vouè!

- Mon Dyu, èthe pochubio..vint'an? dzoa po dzoa?... Vo inke vouè?

La poura dona chavi pâ kemin ratinyi chon chohyo. Po pâ chè mothrà tru èthenâlye, i katyivè chon vejâdzo din lè man.

- I moujo a pou pri chin ke vo trakachè Madama!

- Di tètubio chovinyi, tyè vou the?

- Vo ditè tyè vou the, vo mè konyidè?

- Ché pâ!... i chu fro dè mè papè.

- Vo krèdè pâ ke chu l'inkouja d'ôtyè?

- Kemin krère ôtyè dinche.. pou t'ithre ke li a ôtyè? prou chure apri to!

- Lè l'anonthe de la mècha dou bu dè l'an ke m'a intrètiryâlye

- Ti ma filye kratya, lè veré... n'in chu to t'èkafoudia... ma chôpié, ne krè chuto pâ ke ta dona t'a abandonâlye.

- Ma dona?

- Ta dona, lè prou chure veré. Li a vint'an, lé vèku la pye tètubia pâcha dè ma lya. Vin t'achetâ na vouërba, i krèlyo ke vô mi dre tru tâ chin ke m'a trakachi vint'an dè tin.

Kan chon jou achetâlyè, la dona l'a rèprê :

- I krêlyo ke vô mi to dre. Rosa, nouthra filye l'avi pâ vouéro avu dyije-nov'an. I faji partya de la chochyètâ dè tsan. L'an tsantâ po la bènichon. Li a falyu chêrvi na tropa dè chudâ, di rèkruvé k'iran dè pachâdzo, in manœvrè. Chè amouratya d'on ofihyi... Chin ke falyi pâ lè arouvâ. La poura li l'a rin oujâ dre, ma trè chenannè pye tâ mè chu apêchute d'ôtyè. L'a pâ fi bi pèr'inke. Chènya lè jou to rèvintâ. Li a pâ jou molyin dè li fère intindre réjon. Por mè kemin po Rosa, irè pâ tyachon dè fère a pachâ chin. E po chènia, onko min tyachon dè chuportâ la vèrgonye, dè fère a chavè ke nouthra chole filyètâ irè inbarachia, k'alâvè vinyi dona d'on bâchko. Lé pâ jou vouéro a dre. Rosa li a falyu modâ to tsô, chêrvinta pè Dzenèva, on an dè tin, vè di j'èthrandzo. Li a falyu kôvâ chon piti léva lé. On lyâdzo le tèrmo inke, lè jou a l'èpetô po l'akutsèmin. L'a a pèna lyu cha pitita. La li an touâcha, l'a pâ chu lyô lè jou balya. Lé pâ oujâ tsèrtyi a le chavè; pèr inke, no chin chobrâ mudo è moutsè, no j'in dèvejâvan pâ, falyè ke nion chatsè rin.

Rosa lè chobrâlye on'an pèr lé. Pèr inke, lè dzin l'an rin apêchu. I chinbyâvè ke to chè ch'irè pachâ kemin na kroulye chyâlye, ke to t'irè arandyi po le mi. Ma le mô, le pi irè pye katso. Nouthra Rosa lè rintrâlye in piorin te pou le krêre. L'avi pèrdu le go dè rire è dè tsantâ. L'a rèfoujâ dè rèprindre lè rèpètichyon dè tsan, dè rèmontâ chu la loulye adon ke totè chè kamerârdè li rapalâvan le piéji ke l'avan dè l'oure tsantâ. I l'aterivo din lè lotô po li tsandyi lè j'idé; i prenyi pâ mé dè piéji dè gânyi on bi lo tyè dè rintrâ a vudyo. Chènya kudyivè l'intrinâ din lè fithè. A la bènichon, l'a èprovâ de la fère a danhyi. Kan di dzouno l'invitâvan, chè j'yè vouityivan din le vudio; che krijivan lè mio, chon fô ri pye trichto tyè dzolyà mè mothrâvè ke chon kà irè ôtra pâ. Portan, Dyû châ ch'irè galéja. Li a rintyè a tè vouityi, ti la mima.

- Chôpyè, ditè-mè pâ chin!

- I rèlyivè tyè di j'âlyon chonbro, i arojâvè lè botyè chin piéji, i chinbyâvè ke la mouâ rôdâvè din la méjon. I akutâvè pâ pi mé la mujika. Le pye tètubio, irè de la vère prindre la pitita filyètâ de la vejena, dè l'inbranchi è dè la vouèthotâ. Povi pâ chin dèbarachi, irè la chole ke li èhyirivè lè j'yè, ke li rètsoudâvè le kà. Li a pâ fôta dè dèvenâ ke piorâvè chovin din cha tsanbrèta; chè motyâ iran chovin matso.

- Piakâdè, chin ke vo mè ditè mè fâ a lègremâ!

- A mè achèbin!... lé chovin prèlyi, piorâ in katson in moujin kemin i poré li rèbalyi le go dè vivre è dè vouityi la lya de la bouna pâ. Vère muri cha filye, dinche dzouna, chin avi pu chonyi lè pyâlyè ke li an dèkucheri le kà, lè tètubio po na dona.

- Muri dinche dzouna!... che pire ôcho pu la vère... tyè ke n'in chavé rin!... Iro la filye dè mè parin. Kemin chavè chin ke lè arouvâ kan iro tota pitita, kemin chu jou adoptâlye. Nion m'a dèvejâ d'ôtyè dinche.

- Lè veré ke muri a karant'an lè rounyi le bi de la lya i dzin. L'a jou na drôla dè kouêrta, de la fèvra ke voli pâ pachâ; la kemihyi a ruja, a tuchi pè grantè tyintè. I voli rin dè mèdzo. Kan le mô l'a keminhyi a inpèri l'a akchaptâ d'alâ a konchulta. Li a falyu a l'èpetô to tsô, ma irè tru tâ. Le tsankro li avi ravadyi lè pormon, l'aournè pè ch'in prindre ou fèdzo. Lè vinyète a rin dè duvè chenannè. La poura li ch'inbyâvè pâ règrètâ dè muri. I chè èhyinte kemin na tsandèla ke l'a toumâ che n'èlo.

- I vo dèvejâvè pâ dè chè pènè, dè cha filyètâ. Rosa la oujâ dre to bounamin...anfin, dè mè, dè che n'ofihyi?

- Ajo pâ pire le dre... dèvan dèvan dè muri, i m'a de, de na vouê ache biantse tyè chon linhyu: che djémé chi dzouno rèvin dèmandâ apri mè, ditè li to, di li rintyè ke lé djémé amâ tyè li.

- L'a de chin? portyè?

- Kotyè tin apri ke lè modâlye po Dzenèva, on dzouno lè vinyè tantyè vèr no. Ou kabarè, la dèmandâ apri na filye a non Rosa. L'avi olyucha tsantâ, l'avan fi dutrè danthè. Chènya li a rintyè de ke li avi rin dè Rosa din la méjon. Li a pâ balyi l'èpâhyo d'intrâ è dè dre nekoué irè, nè du lyô i vinyè. Li a prèchke kotâ la pouârta ou nâ. Fô dre k'irè adi to rèvintâ pê ha Rosa ke chè léchia inbarachi. Lè bin damâdzo k'iro pâ inke, ke lè pâ rèvinyè. L'aré pu li dèvejâ, le tyachenâ on bokon. Prou chure ke chi dzouno tinyè a rèvère Rosa, k'irè pâ èthrandzo a chin ke lè arouvâ.

- Mon chènya!... pou t'ithre!... che balya?

- Prou chure! Ma poura Rosa m'a onkora de in dzemotin, din chè dèri chohyo : ch'on yâdzo te travè ma pitita filyèta, di-lè ke lé pâ vèku on dzoa chin li moujâ, chin vère chè dou piti j'yè ke m'an vouityi kan mè l'an prêcha fro di man.

Lè duvè fèmalè chè chon tsejètè din lè bré l'ena dè l'ôtra in piorin. Chavan pâ mé tyè lou dre.

La dona l'a rèprè :

- Vouète ha tèra, nouthra méjon, to chin irè chio... no j'an nion mé... lè on grandyi ke tin nouthron bin... to chin irè por li, che tè fâ invade, lè to por tè.

- Tyè dre dè to chin, li a prâ d'afère ke mè rèbulyè le kâ...I mè chinbyè ke lé na dona dèpye.

- Che pire te pouéchè rèvinyi, rèbetâ de l'aligranthe din la méjon, on bokon dè dzoulyo è dè pé din mon kâ dè gran mère.

- Lè promè! i chinto ke lé prâ a aprindre chu mon pachâ, chu ma dona, pou t'ithre chu mon chènia. Mè fô rètrovâ me n'èchyin. Le chindè dè mè premi dzoa l'a prè na hyiranthè èthrandze. To chin va mè balyi a rèfôrfelâ a tsô pou, le pye dàthamin pochubio. Vèr no, i m'atindon, i fitho mè vint'an chta né. I fari a kotô dè rin; le boun'an ke lé rèchu vouè lè orèdyi dè fi tan drôlamin inkemahyâ ke mè fudrè lè déboualâ tyè piti a piti.

Filye è gran mère lègremâvan adi in lou j'inbranchin po prindre kondyi.

Chu la foucha dè Rosa, li avi on novala trotse dè roujè rodzè.

Le grô Retsâ

pê Kotyè j'èpèluvé

konto novi

Li dejan Retsâ. Chè parin, di pourè dzin, l'an pâ bin moujâ ke chi non dzourâvè on bokon po lou bouébelè. Li, n'in voli pâ a cha dona dè li avi balyi chi non dè Richard ke li a koulâ i rin kemin na pounéje. Binchure ke pê l'èkoula chin li a valyu kotyè mèpri.

Fâ rin, le pouro Retsâ ch'inbalyivè ou travô. L'a pu chè betâ in trin chu on bintsè. Piti a piti, l'a pu li apondre kotyè poujè. To t'alâvè bin, prèchke tru di vouêrbè. La dzaloji dè chon vejìn prenyi forma; ou lyin alâ, la malatsanthe l'a keminhyi a le chèkutâ. I chonyivè chè bithè ou to fin, irè boun'ariâre è i kolâvè tyè di lârmè. Chon fromin, chènâ din na têra provinda promèti bin. Ou momin d'èkàre, li chinbyâvè ke lè chatsè iran pêrhyè, ke chè rinpyâvan pâ d'achuvìn.

Tônon, chon vejìn, ch'èchkormantivè prou min tyè li; irè tardu po chè lèvà, goutâvè grantin, ratâvè nè fithè nè fèrè. Vêr li to t'alâvè bin. I kolâvè prà, faji dou bon avui chè grannè, l'avi l'akouè dè fére di valyintè tanpônè, dè ch'intrètinyi din lè gargotè. Cha fèna la portâvè hôta achebin, vihya a la mouda, faji pâ vilyo avui chè nipè.

On bi du midzoa, Tônon godyivè na pechinta kouète, a rèbedou chu le ban dèvan la méjon. Retsâ chè teri pri po l'akutâ ronhyâ. Le vouityivè menâ lè brè, fére di minè d'omo grindzo, mô kontin. Li a chinbyâ oure chon non. On chêtin Retsâ dèvechi li tinyi man, li chonyi mé dè lathi, mé dè fromin.

Hou palâbro drôlamin dzemotâ l'an pekâ ou vi. Retsâ chè teri to pri, la prè l'oulèta d'ivouè a mityi pyèna dèkouthè le vèro dè dzinthanna ou dremian. L'a piantâ le piti dè a Tônon din l'ivouè. I konyechè chi chèkrè po fére a dèvejâ hou ke douârmon è bratsoton din lou chondzo.

Djémé l'ari kru fére a dèvejâ Tônon chin le rèvèlyi.

- Di-vê Tônon, vouéro tè dè Retsâ chtou dzoa ke vin?
- Te le châ prà, tè lé dza de... i vu le tyè dè cha granna è dè chon lathi, atan tyè l'an pachâ... te l'â promè!
- Mè, té promè to chin ?
- Tè! prou chure, koué d'ôtro? Té prou rèkonyu avui tè pi dè tyivra. Chta né i oudri vèlyi lè fiàdzè, lè la Chin Gorgon.
- Vèlyi lè fiàdzè, lyô chin?
- Te le châ mi tyè mè, t'i vinyè inke on pâre dè lyâdzò...lè tè ke te m'â mothrà l'indrè. Chta né, la lena rênòvalè è lè fiàdzè chon hyoriè, i oudri t'atindre. I vu le byâ è le lathi a Retsâ kemin chtou j'an pachâ, i vu la mitya di j'à a Jebé de la Karèta, tè fô achebin teri le rimo a chè dzenilyè, ma fèna l'a fôta dè j'à. I vu to chin ke t'â promè, rintyè chin.

Tônon keminhyivè a chè dèmenâ, a chè frofâ lè j'yè. Retsâ l'a jou greda dè ch'ètsekâ dè dzubyèta dutin ke Tônon chè dèpityèrnâvè to bounamin.

Chin ke l'a olyu l'a tsankramin rèbulyi. I chavè k'on lyâdzò, di chorchié chavan teri le rimo, fére kolâ le lathi di j'ôtro din lou chèlyon, teri l'èrdzin ke totyivè chi de la bouteka kan i palyivan le chukro. Chè chovinyè di konto a Katilyon ke povi robâ lè j'à in katson,

chin ke nion vèlyichè rin. L'a totèvi kru k'irè di konto, di j'invinhyon d'on lyâdzo po fére a pouère i dzin.

Chi bàgro dè Tônon l'avi chure on grimoàre por invoutâ lè dzin. Lè prou chure dinche ke l'a aprè hou routhichè dè chorchyé, ché moujâvè Retsâ.

A pèna dèchoulâ dè cha kouète, kemin a-the pu ché léchi teri lè vè dou nà, mè rèpondre è dre to fèrmo chin ke li trotâvè pâ la bôla. Le dyâbio l'a topari prou povè po dèdyijâ ché patsè è ché promèchè. Portyè l'a pâ rounyi le chubyè a Tônon. Le léchi tsebrotâ ché rujè po robâ chon vejìn lè topari drôlo.

Retsâ lè rintrâ a l'èthrâbio in ruminin hou drôle dè réjon. L'a fi le toua dè ché vatsè, min bounè tyè hou a Tônon kanbin chon mi markâlyè po le lathi. Moujâvè a ché tsan dè granna, i bi j'èpi ke l'avan tyè di rindèmin dè mijère.

On kou la vèlyà arouvâlye, l'a lyu Tônon prindre le chindè de la dzà. L'a tâtyi dè le chyèdre po chavè che di lyâdzo, li avi dou veré din lè palâbro ke l'avi chorèprè. Tônon lè arouvâ a na krijya dè tsemin, pri de na pechinta trotse dè fiâdzè. On omo a kajaka vèrda è a tsapi a pyumè rodzo irè inke. L'ari bin volu akutâ chin ke dejan, ma l'a pâ oujâ ché teri pri. Ché chon tinyè grantenè la man. Miné i chenâvè kan l'omo vè l'a balyi ôtyè ke Tônon l'a rido infatâ. L'a prou moujâ k'irè chi fameu puthè ke lè chorchyé inpyèlyon po balyi le mô i dzin. In rintrin, l'avi le tsapi teri chu lè j'yè, i alâvè in abohyin la titha è in frounin lè brantsè. L'a kriji Retsâ chin le vère.

Retsâ irè to t'èkafoudi. L'a jou le korâdzo d'alâ tantyè a la trotse dè fiâdzè po vère lyô chi l'omo lè jou ché muchi.

La pâ lyu chtrafa, ma din le chindè, di pi dè tyivra l'avan piatenâ l'âjilye de la ruva dou tsemin dèkouthè trachè dè botè a Tônon.

L'avi cha krochèta d'in na man è na pèra din cha fata. Che di lyâdzo fô fére a vanâ on tsin, ché rakore kan on ch'achoupè, i va bin d'avi lè badyè.

L'a balyi on kou dè krochèta chu lè fiâdzè dèvan dè veri breda. La olyu na vouè li dre :

- Lèva pâ ton bâthon chu mè... è vouèrda ta pèra din la man.

Ha vouè chinbyâvè rèjenâ kemin din on bochè, ma Retsâ, rin tan pourà, ché rèveri po fére fathe chin ché chôvâ. L'omo ou tsapi rodzo irè dèri li. L'avi on drôle dè fô rí, di j'yè chonbro ke hyirivan kemin di pèrlè. Li a de in rijolin :

- Chu on èmi, n'òchè pâ pouère.

- I konyecho rin d'èmi ke vo rèchinbyè l'a oujâ rèbrekâ Retsâ.

- Pouârtè rin, li a di j'èmi^{ks} ché tràvon, di j'ôtro ke ché pèjon.. i pu té fére avè to chin ke te vâ.... ti pâ vinyè inke po rin?

- To chin ke vu? i vu rintyè chavè nekoué ti!... Kontre tyè to chin ke vu?

- Trè kou rin kontre dè l'ouâ, dou lathi, de la granna, chin ke tè pié. Lè vouè ou na!

- On pou dichkutâ... trè kou rin, lè tyè chin?

- Fiè lèvi ton tsapalè... apri no patsèlyèrin, a pèrda por mè, chin lè chure.

- Te pou m'inretsi, galyâ po rin?

- Binchure, t'inretsi a pâ chavi lyô rinvoudre l'ouâ ke te pori gânyi.

- Bon.. to chin ke vu kontre mon tsapalè ?

- E na gota dè chan... te chintri rin.. châra ta pèra din ta man. Kan te la chintri pâ mé, nouthra patse cherè fête.

Retsâ l'a léchi tsère chon tsapalè; i ché avanâ din on ré fougère.

L'omo li a tinyê la man na bouna vouêrba. L'a pâ chintu le piti kou dè hyamèta ke l'a rèchu, nè le chan ke l'a kolâ dutin ke cha pèra li fondi din la man.

- Ora, nouthra patse lè fête, te mè dè rin mé. Tota la fêralye ke te totsèri chè tsandzèrè in ouâ. Tè fudrè vinyi mè trovâ inke dodzè yâdzo, la vèlya dè pyèna lena, te mè dè onkora dodzè pintè ~~gotè~~ dè chan.

Retsâ lè rintrâ vèr li chin bin konprindre chin ke li arouvâvè. Lè rintrâ intye li de na drôla dè tourdze, grindzo, avui lè j'idé è la konhyinthe rèbedoulâlyè.

Le tsin ke li choutâvè kontre avui piéji kan i arouvâvè, chè katyi din cha kâja. Retsâ lè jou teri cha tsèna po l'anyatâ. Chtache lè vinyète pèjanta, cha bala kolâ dzôna hyirivè ou bi dè lena. Irè dè l'ouâ.

Tônon n'in rèvinyè pâ. La tsèna dè rètsandzo ke lè jou tsètyi po nyâ le tsin l'a achebin veri in ouâ. Li a falyu èthatyi le tsin avui na kordèta.

To chin ke totyivè avui la man balâfrâlye pè la hyamèta dè l'omo vè prenyi le pè è la kolâ dè l'ouâ. L'intse dou no, lè robinè de la méjon, lè j'éjè de l'othô, to t'irè vi dzôno.

Retsâ lè vinyè fro delé retso. L'a atsetâ le tsathi, la mitya dou velâdzo. I akaparâvè to chin pire patsèlyi è i palyivè kontin.

L'a piakâ d'ariâ è dè chènâ por akrèthre la bolye è lè chatsè a Tônon.

L'a pâ mankâ dè palyi le richto dè cha dèvala a l'omo i pi fortsu in alin vèlyi lè fiâdzè. Li a teri thin pintè dè chan in dodzè lenèjon, atan dè kathè dè chan ke bouraton din le kâ d'on omo.

Retsâ irè a choudzihion dè nion fro dè l'inkornâ. I alâvè a la chète, li menâvè on trin dè dyâbio, chè vouitâvè avui lè chorchyèrè ke mèrchetâvan in fajin lè pirè pouèrtsèri. Le kornu trônâvè chu on lordo boke, ache pèlà tyè dèginyâ. I molâvan a dègotâ la mindra di katin, trakouâvan dè ku è dè titha in fajin di manèrè ochkurè. Lou mèchè nèrè iran fètè dè chakramintâlyè a balyi la pi d'oulye.

A fouârthe dè fithè è dè bonbanthè Retsâ lè vinyè bourdzu è borinhyo. Rin n'irè tru tyè po kore la geuje è vanglâ. Irè pyin dè j'èmi, cha trâbia irè totèvi garnia dè dzin ke l'akutâvan, ke trolyivan chin avi fôta dè pônâ. Irè pâ mé le piti Retsâ ke trakouâvè chu chon bintsè, ma le chinyâ Retsâ ke trônâvè din lè gargotè. Hou ke ch'akrotyivan a chè bachkè chè dèverivan dou mohyi è de la relidzyon. L'inkourâ, ke l'a volu le chèrmounâ lè jou rèbrekâ avui na kobia dè dzouron è dè mèpri.

Ma to prin fin, fro le tsèrpin, ke prin fu, dion adi lè dzin.

Retsâ l'a keminhyi a chintre kotyè pekâlyè de la pâ dou kâ. Lè jou chè pyindre a l'inkornâ. Chtiche l'a prèchke rijolâ dè dzoulyo in li dejin ke to l'ouâ ke l'avi mangounâ povi pâ li rèbalyi vint'an. L'a kudyi kore lè mèdzo, midyi, èprovâ lè mèlyou rêmèdo, rin le rèbetâvè d'apion po fére la nothe è bonbanhyi. Lè martyan dè drougè è dè chèkrè l'an pâ jou mé dè povè tyè lè mèdzo. Le kâ hyintyivè adèbon, i povi tyè mè chohyâ in rankemalin.

On kou dè chan l'a rèvou le grô Retsâ on dèvèlné ke rintrâvè de la chète. L'an trovâ a rèbedou, inpakotâ din la râlye dou tsemin.

Che n'intèrèmin chè pachâ drôlamin. A la pouârta dou mohyi, katre j'omo ke le portâvan l'an lâtyi prêcha. Le vâ l'a prè le pê de l'ouâ. Li a pâ jou molyin de le trinâ pri di dzènè. L'u bènète ke lè dzin li fièjan pê vatyè châvanâvè in tsifrenin, i dèpourâvè chin molyi le vâ.

Lè dzin chè vouityivan chin pire dèvejâ, chè chon ètsekâ a la kouète, lou chinbyâvè k'on pachyèdre rôdâvè outoua de chi vâ. Moujâvan prâ ke le dyâbio l'avi tinyè man a Retsâ, k'irè j'ou innortyi è mètrèlyivè adèbon.

On lyâdzo le mohyi kotâ, le vâ lè rèvinyè pye lèrdyè. Lè fouchèlyâ l'an l'intèrâ fro de tèra bènète, avui hou ke l'an innèvouâ la relidzyon è lè chakrèmin.

Hou ke li korchan apri in li fajin di rètrahyon, ke profitâvan de chè brochè è de l'èrdzin ke tromintâvè chè chon tsankramin rèvintâ. L'an keminhyi a lou rindre konto ke le chinyâ Retsâ lè j'intserèlyivè po lè vindre a l'inkornâ, ke l'ouâ èpardzemalâ a la kouète fournethrè din le chupion.

Hou k'iran prè a partadyi chè richto de fortèna aprèhindâvan de teri profi de l'èrdzin teri ou rimo è chotèlyi pê le dyâbio.

On kou tyithâ chon mondo de ripalye, le chinyâ Retsâ ke l'avi tan mariâ la mouda de chè fére a rèchyèdre pèto l'a jou le kulô d'alâ fière a la pouârta de Chin Piéro.

- Pèr inke, li a de le gran Chin ke manèlyè lè hyâ dou paradi, on pou rin atsetâ avui de l'ouâ. Lè pâdzè de ta lya chon pye nèrè tyè le tsèrbon de ton patron i pi forsu.
- Li a pâ molyin de folyatâ le lêvro de mè premi j'an, l'a oujâ dèmandâ le danâ. Chu jou batyi, lé bin jejou prèlyi, l'è chi lâre de Tônon ke m'a tsanpâ din lè grifè dou dyâbio.
- T'â fè a ta dyija, te li â balyi to chan, t'â korè la chète, lè mèchè nèrè. T'â mèpriji ton tsapalè è la relidzion. T'â rèlyi chu tèra ta pièthe po l'ètèrnitâ.
- Mon chènaya vo j'amâvè bin, irè a non Piéro!

Ma Chin Piéro l'akutâvè pâ mè, l'avè mé tyè Retsâ a rèchyèdre a la pouârta.

- Nouthra Dona chôpyé, l'a bramâ le danâ.. ma dona a non Marie m'a konchakrà a Nouthra Dona di Mârtsè kan iro bouébelé, pityi de mè.

Nouthra dona l'a olyu chon non, lè vinyète ginyi a la pouârta.

- Nouthra Dona, Eve, vouthra dona, l'a mâlye achebin, l'a èkrajâ la titha dou kroulyo ou keminthèmin dou mondo. Che pouécho, i balyèré to l'ouâ ke lé inmochalâ por idyi lè pouro. Chôpyé! i mè rèpinto d'avi lâtyi ton tsapalè, l'avé portan prèlyi di thin lyâdzo dèvan de mè léchi intsèrèlyi pê le dyâbio.
- Prin ha krujilye, lè pèrhya kemin le tron di pouro. Po lè premi pâ ke te fari vèr no, tè fudrè na pithe d'ouâ, pye tâ tè fudrè drobyâ è rèdrobyâ la mija. Dinche te vèri on piti ôtyè de chin ke t'â pèrdu in mèpriji lè chakrèmin è in pyatenin lè kemandèmin dou Bon Dy.
- Mèrthi bouna dona, lè prou tyintô d'ouâ po mè palyi le bouneu de l'ètèrnitâ, vouthra bouèthe di pouro cherè pyèna de vire tè delé.

Retsâ la pachâ la pouârta de Chin Piéro chin pire dre mèrthi. A ti lè pâ ke fajè, cha tyèchèta faji na krejenâlye. Tyè ke chtache l'avi rin de fon, i chè rinpyâvè pâ. Portâvè

rin, Retsâ irè chorèprê pê la bioutâ dou paradi. Hou pithè ke bouratâvan adi pye rido le charganyivan pâ. Mé i avanhyivè, mé irè intrètsantâ pê la bioutâ de l'indrê. La lyuva irè tan bala ke la kola de l'ouâ irè pâ dè konparèjon. Mimamin le chon di pye balè roujè kurtilyè din lè pye bi kurti dou mondo l'avan pâ la chintyâ dè l'è dou paradi. Faji bi oure achebin. Lè tsan è la mujika ke lè j'andzè chon chole à chavi dzulyi l'inverenâvè d'on dzoulyo ke l'avi djémé konyu. Irè mè tyè bènirâ.

Retsâ chè chinti tan alègro pèr lé d'amon k'akutâvè panyi dègradalâ cha fortèna, ke gravalâvè adi pye rido din cha krujilye. Mé i avanhyivè, mé l'invide le prenyè i tripè, mé to chinbyâvè adi pye bi.

Lè pâ jou gran ke la boura dè chè lu d'ou l'a keminhyi a bèthèlyi. Li avi di ratâ. Retsâ vinyè prè ou chohyo, li falyi ch'arèthâ, rakuchi chè pâ. L'a keminhyi a infonthâ. I vèlyi pâ mé chè botè. La né li inbornâvè lè piôtè, li katyivè lè man, li montâvè tantyè i j'èpôlè. Dèvan d'ithre innèlyi din na niola chère nère, Retsâ l'a bramâ :

- Nouthra Dona, ou chèkoua!
 - Mon pouro tè, li a pâ prou d'ouâ chu la tère po palyi le paradi. On tyintô d'ouâ amon pèr inke i vô pâ le mindro mochi dè pan balyi a on pouro.
 - N'in dé jejou balyi dou pan i pouro... on kou, i lé mimamin dzubyâ na pithe d'ouâ din le krebilyon d'on pour dyâbio.
 - No le chan, t'à fiè ta pithe avui mèpri, lè tsejète dèkouthè le krebilyon.
- Le pouro novèlyin l'a pâ trovâlye.

Retsâ l'a chintu la vèrgonye li èthrindre lè tripè, ma chon kâ, du kemin la pèra ke tinyè kan i vindi chon chan, chè dècharâvè pâ. Chè j'yè achebin, iran iran tru chè po lègremâ. To lè jou krache kemin chon kou dè chan. Le chorchié lè tsejè din na niola dè fougère. Lè jou ch'èthèdre i pi dou dyâbio k'irè a tsavô, chin dèvan dèrè, chu le boke ke montâvè a la chète.

- T'arouvè toparè po rètsoudâ tè routhichè din mon rètré, li a de chtiche in chè fotin a rire. I rètsouhyivè lè nari kemin on tsin inradyi è i menâvè cha barbèta rochèta kemin chon bèthornâ.
- Rin mè mon chan è rèprin ton ouâ!
- Ton chan kontre mon ouâ? pouro tè, tè t'i rinâ a la pouârta dè mè j'ènemi. Tè chàbrè pâ le mindro lu d'ouâ, pâ le mindro kurtse. Kemin te vou fére on fro. Inke, on dèfâ pâ lè patsè. Pâcha dèvan!

Le pouro li a falyu chyèdre di kolyâ chonbro è néji, palyâ dè brâjè. I vinyan adi pye rodzè, adi pye tsôdè. On chon dè bourlire è dè chupion li rahyâvè la gardyèta. Di vouè èthrandzè, mèhyâlyè dè pyintè è dè rankemalâlyè a balyi la pi d'oulye li bordenâvan din lè j'orolyè. L'indrê irè pourà, afreu pou a vère. E le pi, la lyuva dè chi tro dè paradi ke l'avi intrèlyu li roudyivè le chan, li faji tan dèpye a règrètâ d'ithre a choudzihyon dè ha binda dè j'inkornâ. L'avan di minè a inpontâ lè pye krâno luron de la Grevire. Ha redâlye dè piti dyâbio chèkutâvan na binda dè chorchière è dè kondanâ ke trovâvan rin dè rètré po lou betâ a chokrè.

Retsâ, dèkunyatâ adèbon, li a falyu keminhyi a trinâ cha mijère din chi mondo dè matsourâ è dè dèginyâ. L'a rèkonyu kotyè chorchière k'alâvan a la chète avui li. Achetâ chu na chatse dè granna inbardoufâlye d'ingoura nère ke li dzefâvè chu la bourdze, l'a rèlyu Tônon, la routha ke li robâvè chon lathi è cha granna in terin le rimo. I èprovâvè d'ariâ na vatse agota ke kuvatâvè in li inpotsin de la bàja in pyènè potè.

Chu tère, l'ouâ dè Retsâ l'avi fondu, to t'irè rètsandyi in fèrèmintâ.

Le tèchtèmin a Jidôre (Konto novi)

pê Kotyè j'èpèluvé

Mè, Jidôre a Jabèta dou Krotsè è a Djan Delachoupa, chan dè kouâ è budzo d'èchpri, i féjo mon tèchtèmin, che djèmé le kà mè fâ fô bon chin mè fère chunyo.

I rèkemando me n'ârma a Dyu.

Lé pâ totèvi akutâ chè dyêrthon. I m'an jejou chèkutâ din lou pridzo; i fajé a kotô dè chumilyi, ma i konprenyé kan mimo. I tinâvo hou prône a dègrelandâ hou ke l'an travalyi è tsoulyê, a lou dèmandâ dè to balyi po agormandâ lè pouro, hou ke chè chônvon dou travô è ke trominton le bin dè Dyu.

Mon piti lyoupè chu la karèta dou forni l'a rinpyahyi lè mèlyou thêrmon. Bin adôdyi avui mè pepeni a fâra dè vèlu, i oujâvo pâ mè botè a kore lè tsapalè. Nyon rijolè outoua dè mè kan i âbyo dè mè fotre a dzenâ è dè m'abadâ avui lè j'ôtro din lè j'ithro dè mohyi.

Lè veré ke lé jejou fê di pechintè chakramintâlyè, chin bin moujâ a mô fère. Falyi chin po mè rèbetâ d'apion. Che vo j'i notâ mè fregâtsè din le gran lèvro, i moujo ke fan le balan avui lè mijérè ke lè dzin m'an fê. Li a prà dè routhè in chti bâ mondo. Lè kemin po lè j'inpou, lè bon lou fô palyi po lè j'ôtro.

I mè rèkemandèré bin ou dyâbio, che djèmé vinyo a choudzihyon dè chè kouâmè on lyâdzo l'ârma pachâlye a gôtse, ma i fô adi chè krêre akrotyi de la bouna pâ. Cheri fotin k'alicho bourlâ din cha tsoudanna, nion i châ le patè pèr lé d'avô. Chu jou a konficha li a on pâre dè mê, lé pâ jou fôta dè rindre lè moulo dè fothi ke lé prè a l'ètha. Falyi bin ke mè ratrapicho de l'amanda po la brakona d'ena lèvra.

D'a premi, fudrè dèbarachi mè j'éjè de la lodze, ha ke l'a la pouârta infonthâlye du ke lè lâre l'an robotyi din mè vilyèri. Che lou pié dè prindre la chenalye findia ke l'an oubyâlye, i pouârtèri pâ pyinte, lè lâre l'an mèlyou tin tyè lè brâvè dzin avui lè dzudzo.

Ma réche a rabo, la balyo a Fine a la Nyuva. I li rèchinbyè bin galyâ; lè tota bêtse è ma réche l'a dutrè din ke mankon.

Mon forni dè fê, chi ke pére gran inpyèlyivè po brejolâ lè tsathanyè lè po Dyan a Kretyu; i porè kouère lè j'alyan ke robè dèje mè tsâno.

Mè pâna man in charpilyére cheron po Dyanè ou Pyolyà. Chon dyuchto adri ritso; i van d'èchtra bin po dèkrotâ la grêche a ariâ ke li dzefè intrèmi di dè.

Mon tsê a redalè, chi ke m'a fi a dzourâ dè radze in gravin pê la lodze lè po Kechto de la Kanpina. I farè le pâ avui le chio; lè porè fetyi l'on chu l'ôtro.

Lè fortsè dè bou, lè lin dè palye è lè bochè a dichtilâ, hou ke chon pâ tru dèmêrlotâ cheron a partadyi intrè mè trè filyu; i rinpiathèron lè boun'an ke lé oubyâ dè lou balyi. I poron onkora lou partadyi lè rabo è lè badyè ke trènon din le boufè de l'achotha avui lè j'agrafè è lè rètrètè ke lé pâ inpyèlyi po fêrâ mè chorkè.

Oh kredyé! dè tsanthe ke moujo i taréchè.

Mè tsemijè a inpèjâ cheron po Biéjo ou Pèlà. Chon adi galyâ biantse, ma i tràvo nyon mè po plichâ lou grantè mandzè.

Li a achebin mè botè dè kontinjan, on bokon rêdè è néjyè, ma adi bin fêrâlyè. Lè balyo dè bon kà a Guchti ou Biado. Kan i marôdâvè mè pre a mouchka li aran rindu chêrvucho. Avui hou chakré botè, chè cheri pâ trochâ na piôta; l'ari pâ dzubyâ in ètsarin na brantse.

On moujè djêmé a to. Mè fô betâ na linye po la Juli dou Bâ dou riô, ouna ride dyâbia. N'in rijo adi in moujin ou boton dè bralyèta ke li a falyu mè rèkâdre. Betin-li dou kornè dè pre chè è on chatsè dè chenêtsè.

Apri to, i tracho ha linye, chin i règârdè nion. Mè j'èretè l'an pâ fôta dè chavè portyè chi boton l'a choutâ. Mè chu konfèchâ dou lyâdzò dè chin. L'ôtri, le kapuchin chè tan inbourdilyi dè rire kan li é kontâ me n'avanture ke l'a oubayâ dè mè balyi la pènetinthe po le moulo de l'ètha.

Mè fudrè trovâ kôkon po teri a profi dè mon katse bori. Du ke lé atsetâ le trakteu, li a bin vin t'an ke to i dzoukè inke po rin. Li a di bori dè vatse, on vilye dzâ, di trè dè tsenèvo, duvè j'èchkourdyè, ti lè dzovè ke trènon du ke lè vatsè l'an lè kouârnè èmoutyè, chin kontâ lè mâlyenè, la kropère a bohyè dzônè, lè lin è lè tsèvèthro. To lè pâ dè rèbu; chuvin tyintè vilyèri tràvon di j'amateu. Thiprilyin ou Tyinko pori n'in teri a profi por apyèlyi la vatse k'apyèlyè a chon tsarotè dè fin po kore le kortéje de la mujika.

Lè galyâ to por vouè, mè chu dza on fiè tro dèvithi.

Kan l'ari takounâ l'ètyila, i oudri chu le tintèbin, li a bin kotyè nipè a dona rèvouchè din le tsô de l'avèna, di bin bi j'âlyon chon prin la pèna dè lou brochi la putha è lè j'aranyâ. Li a bin di fèmalè ke l'an pâ jou l'akouè dè lou vithi kemin la mâlye.

Lâ vouè mon Dyu! To chin mè fâ mô ou kà. Lè pourà kan i vouèto amon la bouârna. Hou balè tsanbètè, ti hou linju è hou pan dè bon bakon vérâ... na na.. chin lè pâ pochubio, i pu pâ moujâ ke kôkon d'ôtro chè va lyindâ dè tota ha kalyeniche. Li a onkora de la bovena du ma falyu majalâ la Bolonye ke lè tsejète dou gonhyo.

I pu topari pâ dèchidâ ora dè choche balyi lêvi. Chin l'a de la valyâ. Lè pâ lè kapuchin ke tirèron bâ na tsanbèta, chon pâ nyâlyè avui dou kroulye brinyon.

Li a onko hou toupenè dè vinkouè, hou chatsè dè chenêtsè, di bon chètseron dè pomè dàthe. E hou ranpannè dè prâma, dè poma è dè dzinthanna. Ché pâ portyè mè chu tsoulyè dè n'in bère kotyè vératsè. Apri to, n'in vé tsèrtyi to tsô na topèta, mè fô n'in tsuva na bouna golâ po mè balyi dou korâdzò.

Mè fudrè na linye po hyoure le moua a chi kotyin dè Julon a la Rochèta. La jou le kulô dè mè dre ke din pou dè tin, i cheri le pye retso panchenéro dou chimetyéro. Kuvinye va! tè rètràvèri.

Vo le dio tyè a vo: rintyè dè li moujâ, i chinbyè ke na redâlye dè lâre vo prènyon ou gargachon po vo rinâ. Portan, che dyèmè la chètse chè trônpe dè pouârta, che m'inmandzè ou palyi di tôle chin m'avèrti, i dèmando a chi ke tràvèrè ma bilyôta dè la fotre ou fu, ke pouéchè chupyâ a ma pièthe.

Apri binchure, chè pâ ch'oujo li moujâ... kan i féjo a krejenâ la charalye de ma kemôde, i mè chinbyè totèvi k'on lâre mè gugè pè le fenèthri, ke lè nyô di parè mè vouèton avui di j'yè k'intindon to. Na na, ma tyèchèta dè dzônè, di Napoléon batin nà ke hyèron kemin na lena dè tsalandè, chin chè pou pâ èpardzemaalâ. Lè j'anhyan ke l'an jou le mereto dè lè j'intètyi por mè chè rèvirèron din lou foucha che lè vouèrdo pâ.

N'in pu rin mé por vouè...ma piâma i gurlè.. lè pènâbio dè to balyi lêvi po rin... Kan on moujè ke nion vo derè mèrthi po tota ha fortèna, li a dè tyè atrapâ la pi d'oulye. I vèlyo dza ha binda dè nèvâ, ha parintâ ke van chyèdre le tsêr'a ban dè ma dêrire trota avui lè j'invide de na tropa dè là

outoua de la karkache de na falya. A chè dèmandâ che li a adi di brâvè dzin ke mereton d'èretâ ôtyè. Lè j'intindo dza dzêrgounâ le tsapalè avui di j'yè invèdâ è ruvâ chu ma kemôde.

Li a topari dè tyè radyi dè li moujâ! Iournethri mon tèchtèmin ôtyè pye tâ. Le Bon Dyû dè pâ ithre pye prèchâ tyè le dyâbio, èpu l'ètèrnità lè prou granta. i mereto bin d'atindre tantyè a la chin Djêmé, mimamin pye grantin dèvan d'ithre dèvuthu è dègouéji kemin na foucha abandonâlye

I chinyo adi chi papê, ke prâvè ke chu pâ ache pinyèta tyè ke lè dzin i dion. Dè tsanthe ke la mija di bithè è dou tseô m'a dèbarachi dè travô è dè pochyin. Ma lè chi bin, ha méjon, to le pri dè mon travô, to chin ke lé tsoulyè ke va profitâ a Dyû châ koué, a di nèvâ ke van to rèchièdre chin mè palyi la mindra tiola. Chin n'in dè pâ!

Na, le chinyo pâ! mè fô dremin on pâre dè lyâdzô inke dèchu. I poré tsandiyi d'idé. Lè tyachon dè pâ èpardzemalâ de na vèlyâ to chin ke lé inmochalâ dè tota ma lya.

Jidôre a Jabèta dou krotsè